

Uunga siunnersuut: Aningaasarsianit akileraarutit pillugit Inatsisartut inatsisaata allanngortinneqarneranik Inatsisartut inatsisaat nr. x, xx. xxx 2020-meersoq

Uunga siunnersuut: Pigisanit pissarsiat ilaasa akileraaruserneqartarnerat pillugu Inatsisartut inatsisaata allanngortinneqarneranik Inatsisartut inatsisaat nr. x, xx. xxx 2020-meersoq

(Aningaasaqarnermut Naalakkersuisoq)

Saqqummiussissut

(Aningaasaqarnermut Naalakkersuisoq)

Siullermeerinnineq

Naalakkersuisut sinnerlugit matumuuna saqqummiutissavakka aningaasarsianit akileraarutit pillugit Inatsisartut inatsisaata allanngortinneqarneranik Inatsisartut inatsisissaattut siunnersuut aamma pigisanit pissarsiat ilaasa akileraaruserneqartarnerat pillugu Inatsisartut inatsisaata allanngortinneqarneranik Inatsisartut inatsisissaattut siunnersuut.

Siunnersuutit malittarisassanut atuuttunut allannguutinik arlalinnik imaqarput. Matumani siunnersuutini immikkoortut pingaarnerit kisiisa eqqartussavakka.

Partiit 2020-mi aningaasanut inatsimmik suliaqartut ingerlatseqatigiiffiit akileraarutaata 30-nit 25-nut appartinneqarnissaa isumaqatigiissutigaa. Aalajangigaq tamanna siunnersuutikkut aningaasarsianit akileraarutit pillugit inatsimmut ilanngunneqarpoq.

Kalaallit Nunaanni inuussutissarsiutinik ingerlataqartut pitsaasunik tunngavissaqartinniarlugit sulissuteqarnissarput pingaaruteqarpoq. Inuussutissarsiornermik ingerlataqarnerup ineritsikkiartornissaa pisariaqarpoq, suliffissanik pilersitsissammat Kalaallillu Nunaat pisuunnguallatsillugu.

Nunani amerlasuuni ingerlatseqatigiiffiit akileraarutaat ukiuni kingullerni amerlasoorpassuarni appartinneqarpoq. Akileraartarnermi uuttuutip naqqata tungaanukarnermi sukkaniunneq eqqartorneqarnikuuvoq, tamatumani appasinnerpaamik ingerlatseqatigiiffinnut akileraaruteqartitsinissaaq nunat akornanni unammissutigineqarluni.

Qujanartumilli akerlianik aamma ingerlasoqarpoq ilaatigut OECD-p suliassaqarfiani, tamatumani nunat tamarmik immikkut periuseqarlutik akileraarutikinnerusunut nuttarneq akiorniarneqarluni. Suliaq tamanna Kalaallit Nunaanni takussaalereerpoq, tamanna anguniarlutigu akileraartarnermi malittarisassavut assigiinngitsutigut sukateriffigisimallutigit.

Isumaqassanngilagulli sukaterinerit kisimik ilungersunartunut aaqqiissutaasinnaasut imaluunniit Kalaallit Nunaat nunatut inissisimanini, pinngortitami pisuussutit pissutsilluunniit allat pissutigalugit nunarsuarmioqatinut unammillertussaataaangitsoq.

Inuussutissarsiutinik ingerlataqartunut atugassarititavut nunarsuarmioqatitsinnut unammerlinnaassuseqartariaqarput, taamaalillutik aningaasalersuisartut aningaasalersuutitik ingerlatatillu naleqassutsimik pilersitsisut maanga nunamut inissinnissaat toqqarniassammassuk. Siunnersuut Kalaallit Nunaat nunatut aningaasalersuiffissatut kajuminnarsisinniarlugu suliniuteqarnerup ilagaa.

Tulliatut siunnersuutit aningaasarsianit akileraarutit pillugit inatsimmi aammalu pigisanit pissarsiat ilaasa akileraaruserneqartarnerat pillugu Inatsisartut inatsisaanni soraarnerussutisiat akileraaruserneqartarnerannut malittarisassat teknikkimut tunngasumik allannguissapput.

Allannguutininut taakkununnga tunngavigineqartoq tassaavoq ilaatigut nunani allani soraarnerussutisianut aaqqissuussinerit eqqarsaatigalugit pisut ilaanni maanna malittarisassat erserlullussinnaanerat. Tamatumani ilaatigut pineqarpoq § 39 a, tassani pineqarlutik nunani allani soraarnerussutisianut aaqqissuussinerit inuuneq naallugu ingerlaavartumik tunniuttagartallit. Danmarkip Kalaallillu Nunaata avataani soraarnerussutisianut aaqqissuussinernit iluanaarutit tunniunneqartulluunniit akileraarutitigut suliarineqarnerat aalajangersakkanit pisut ilaanni erserlullussisinneqarsinnaasarpoq. Soraarnerussutisianut aaqqissuussinerit § 39 a-mi pineqartut soraarnerussutisianut aningaaserivvimmi Danmarkimi angerlarsimaffilimmi pilerseqqinneqarsimassasut erseqqissaatigineqassasoq siunnersuutigineqarpoq. Ilaatigut soraarnerussutisiassatut uninngasuutit Danmarkimillu tunniuttakkat pillugit danskit akileraartarnermi oqartussaasuinit paasisutissanik Akileraartarnermut Aqutsisoqarfiup tigusaqartarnera tamatumunnga pissutaavoq. Aammattaaq akileraarutinit A-nit unerartitseqatigiinnissaq Danmarkimut isumaqatigiissutigineqarpoq.

Tulliatut soraarnerussutisianut aaqqissuussinerit ilaannut Danmarkimi Kalaallillu Nunaanni pilersinneqartunut sammititamik aalajangersakkamik ilanngussisoqarnissaa siunnersuutigineqarpoq. Inuit assersuutigalugu nunatsinni piffissami aalajangersimasumi sulinissartik pissutigalugu nunatsinnut nuukkaangamik soraarnerussutisianut aaqqissuussinernik Kalaallit Nunaata avataaneersunik nassataqartarnerat aalajangersakkamut atasutut isigineqassaaq.

Aammattaaq siunnersuutit annikinnerusunik assigiinngitsunik erseqqissaaffiupput.

Naggataatigut siunnersuutit taakkununngalu nassuiaatit innersuussutigaaqka.

Taama oqaaseqarlunga siunnersuutit Inatsisartunut suliassanngortippakka, tamatumalu peqatigisaanik inatsisissatut siunnersuutit maanna siullermeerneqarneranni ataatsimoortillugit suliarineqarnerannut Inatsisartut Siulittaasoqarfiannut naggasiullugu qujallunga.